

Dr. Musli Vërbani

**BESIMI NË KADERIN E ZOTIT
XH.SH.**

Kaçanik, 2016

Planprogrami i muslimanit të vogël

Autor:

Dr. Musli VËRBANI

BESIMI NË KADERIN E ZOTIT XH.SH.

Të drejtën e ribotimit e rezervon botuesi

DUA QË MUSLIMANI TË JETË:

1.	A tdhetar	19.	N dihmëtar i të varfërve
2.	B esimtar i singertë	20.	N jerëzor dhe Humanitar
3.	C ilësor	21.	O bjektiv
4.	Ç lirimtar	22.	i P a thyeshëm si shkëmb
5.	i D ashur për të gjithë	23.	i Q ëndrueshëm si Feniksi
6.	i Dh imbshëm për çdo kënd	24.	R evolucionar
7.	E dukues i shoqërisë	25.	Rr egullues i marrëdhënieve shoqërore
8.	i Ë mbël në biseda	26.	S imbol dhe sypatrembur
9.	F alënderues i Allahut	27.	Sh ëmbëlltyrë për të tjerët
10.	i G ëzuar dhe i lumtur	28.	T ejpamës i problemeve
11.	Gj enerator i të mirave	29.	i Th jesht dhe modest
12.	H ero në beteja	30.	U dhërrëfyes për në rrugën e drejtë
13.	Ideator i zgjedhjes së problemeve	31.	V ullnetmirë i shoqërisë
14.	J etik i veprave të mira	32.	X ixëllonjë i shpresave
15.	K reator	33.	Xh evahir
16.	i L umtur	34.	Y ll
17.	Ll ogaritar i veprave të tij	35.	Z emërbutë
18.	M ënjauës i të këqijave	36.	Zh dukës i të keqes dhe zhvillues i të mirës

**Lutju Zotit dhe thuaj: “O Zoti im
shtoma diturinë.”**

Kur'an

***“O Zoti im më pajis me dituri të dobishme, më jep
furnizim të begatshëm,
mi prano veprat e mia.”***

Hadith

(شَهِدَ اللَّهُ أَنَّهُ لَا إِلَهَ إِلَّا هُوَ وَالْمَلَائِكَةُ وَأُولُوا الْعِلْمِ قَانِمًا بِأَلْقِسْطٍ
لَا إِلَهَ إِلَّا هُوَ الْعَزِيزُ الْحَكِيمُ).

“Allahu dëshmoi dhe vërtetoi se nuk ka zot tjetër përveç Tij, e dëshmuar edhe engjëjt e dijetarët, dhe se Ai është zbatues i drejtësisë. Nuk ka zot përveç Tij Fuqplotit e të Urtit”. (Ali Imran, 18)

(لَقَدْ جَاءَكُمْ رَسُولٌ مِّنْ أَنفُسِكُمْ عَزِيزٌ عَلَيْهِ مَا عَنِتُّمْ حَرِيصٌ عَلَيْكُمْ
بِالْمُؤْمِنِينَ رَءُوفٌ رَّحِيمٌ).

“Juve ju erdhi i dërguar nga lloji juaj, atij i vjen rëndë për vuajtjet tuaja, sepse është lakmues i rrugës së drejtë për ju, është i ndjeshëm dhe i mëshirshëm për besimtarët”. (Et-Tevbe : 128)

Hyrje

Nga Umeri radijallahu anhu, transmetohet se ka thënë:

“Një ditë ishim duke ndenjur te i Dërguari i Allahut s.a.v.s., kur u duk një njeri me rroba shumë të bardha dhe flokë shumë të zeza. Në të nuk hetoheshin shenjat e udhëtimit dhe askush prej nesh nuk e njohëm. U ul pranë të Dërguarit, s.a.v.s. duke i mbështetur gjunjët e vet mbi gjunjët e tij, i vendosi duart e veta mbi kofshën e tij dhe pyeti:

O Muhamed, më trego ç’është Islami? Muhamedi a.s. iu përgjigj:

Islami është: - të dëshmosh se nuk ka zot tjetër përveç Allahut dhe se Muhamedi është i dërguar i Zotit,

- ***të falësh namazin,***
- ***ta japësh zekatin,***
- ***ta agjërosh ramazanin,***
- ***ta kryesh haxhin në Kabe, nëse ke mundësi.***

Ai pohoi: ***Të vërtetën e the.*** Ne u çuditëm! Po e pyet dhe po ia vërteton. Pastaj pyeti: Më trego çka është Imani? Muhamedi a.s. iu përgjigj: - ***Imani është të besosh Zotin,***

- ***Melekët e Tij,***
- ***Librat e Tij,***
- ***Të dërguarit e Tij,***
- ***Ditën e fundit,***
- ***Të besosh në të caktuarit e Tij, të mirës dhe të keqes.*** Ai pastaj

tha: ***Të vërtetën e the.***

- Më trego ç’është Ihsani-Mirësia?
- Muhamedi a.s. iu përgjigj:
- ***Ta adhurosh Zotin sikur e sheh Atë, sepse, edhe pse ti nuk e***

sheh Atë, Ai vërtetë të sheh ty. Pastaj pyeti: Ç’është çasti i Kijametit?

Muhamedi a.s. iu përgjigj: ***Për këtë i pyeturi nuk di më shumë se ai i cili pyet.*** Më trego mbi shenjat e tij. Muhamedi a.s. iu përgjigj:

- ***Kur robëresha t’i lind vetes zonjushë.***
- ***Kur të shihen barinjtë këmbëzbathur, të zhveshur e të mjerë se***

si garojnë në ndërtimin e godinave të mëdha. Pastaj shkoi kurse unë mbeta i habitur, e Muhamedi a.s. tha: - ***O Umer a e njohe atë që më pyeti.*** Allahu dhe i Dërguari i Tij e dinë më së miri - iu përgjigja.

Muhamedi a.s. tha: ***Vërtet ky ishte Xhibrili, erdhi tua mësojë fenë tuaj.***” (MUSLIMI)

KAPITULLI I PARË

PËRKUFIZIMI I KADASË DHE KADERIT

KADA do të thotë dëshirë, vendim përfundimtar apo caktim kryekëput.

KADER do të thotë planifikim, rregullim, sistematizim dhe përcaktim imtë i çështjeve.

Besimtari beson me bindje të plotë në Kadanë dhe Kaderin e Zotit dhe e di se besimi në to është shtyllë kryesore e Imanit.

Kur është pyetur Muhamedi a.s. për përmbajtjen e imanit, është përgjigjur:

Besim në Zotin,
melaqet,
librat,
pejgamberët e Tij,
në ditën e fundit,
dhe në kaderin e Zotit.

Pyetje:

1. Çka do të thotë Kada e çka Kader?
2. Cilat janë shtyllat e Imanit?

LLOJET E KRIJESAVE

Zoti i Lartmadhëruar për nga aspekti i udhëzimit dhe dëshirës i ka krijuar dy lloje të krijesave e ato janë:

1. Lloji i krijesave të cilat nuk kanë dëshirë por i nënshtrohen Zotit drejtpërsëdrejti. Kësi lloj janë: dielli, hëna dhe gjithë planetet.
2. Lloji i krijesave të cilat kanë dëshirë dhe vullnet.

Nga ky lloj i krijesave ka që:

- kanë vullnet dhe dëshirë vetëm të mirë, siç janë melaqet;
- që kanë vullnet dhe dëshirë vetëm për keq, siç është shejtani;
- që kanë vullnet e dëshirë edhe për mirë edhe për keq, siç janë njerëzit.

Pastaj nga lloji i njeriut kemi:

- ata, të cilëve imani dhe logjika mbizotërojnë mbi epshin dhe dëshirën, ndaj dhe hyjnë në rangun e melaqeve;
- ata, të cilëve epshi e mbizotëron tërësisht mbi imanin dhe hyjnë në rangun e shejtanit;
- ata, të cilëve e mbizotëron epshi i shtazëve dhe kafshëve, ndaj dhe hyjnë në rangun e kafshëve.

Pyetje:

1. *Sa lloje janë krijesat e Zotit për nga përudhja e dëshira?*

NJËSIMI I ZOTIT DHE KADERI

Allahu është i Vetmi krijues absolut.

Kur njeriu të mësoj se Zoti vepron si të dojë dhe se të gjitha punët i ka në dorë, atëherë ai bindet dhe pajtohet me kaderin e Zotit. E kur të pajtohet me kaderin e Zotit, atëherë njeriu nuk shqetësohet pa masë për ardhmërinë e vet, por ecën i sigurt drejt ardhmërisë, pa këqyrë shumë se çfarë do t'i ndodhë.

Zoti i Lartmadhëruar në Kur'anin fisnik thotë:

“Thuaj: O Allah, Sundues i çdo sendi, Ti ia jep pushtetin atij që do, Ti ia heq prej dore pushtetin atij që do, e lartëson atë që do dhe e përul atë që do. Çdo e mirë është në dorën Tënde, vërtet Ti ke mundësi për çdo gjë!” (Ali Imran, 26)

Pyetje:

1. *Përse ndihmon besimi në kaderin e Zotit?*
2. *Thuaje ajetin, me të cilin shpjegohet se Zoti i jep e i merr pushtet kujt do?*

DREJTËSIA DHE KADERI I ZOTIT

Njeriu kur të besojë në Kaderin e Zotit, e di se Zoti të gjitha çështjet i ka caktuar me drejtësi. Kështu, sepse e di se Zoti është i Drejtë, ndaj dhe me drejtësi ka vepruar ndaj njeriut. Dhe, besimi në Kaderin e Zotit e bën më të fuqishëm dhe më të drejtë në veprime, sepse ai e di se Zoti askujt nuk i bën padrejtësi dhe askujt nuk ia humb shpërblimin e punës e të mundit. Për këtë, Zoti i Lartmadhëruar në Kur'anin fisnik thotë:

“Allahu nuk ua bën aspak të padrejtë njerëzve, por ata i bëjnë të padrejtë vetes së tyre”. (Junus, 44)

Pyetje:

1. *Shpjego për drejtësinë dhe Kaderin e Zotit xh.sh.?*
2. *Thuaje ajetin që tregon se Zoti nuk bën padrejtësi?*

MËSHIRA DHE KADERI I ZOTIT

Kur të besojë në mëshirën e Zotit dhe të dijë se mëshira e Zotit është absolute, njeriu është i qetë, i sigurt dhe jeton e vepron pa brenga. Njeriu pajtohet, atëherë, me gjithë dëshirë me kadanë e kaderin, ngaqë ka vetëdijen se për të ka përcaktuar Zoti, të cilin e di për të Mëshirshëm. Kështu, rrjedhimisht, asnjë ndodhi nuk mund t'ia humb shpresën te Zoti i Madhëruar.

Pra, besimi në kaderin e Zotit ia qetëson shpirtin dhe zemrën njeriut, ia siguron trupin, i jep shpresë dhe vullnet që ai të veprojë dhe të punojë pa pasur brenga që do ta pengonin.

Zoti i Lartmadhëruar në Kur'anin fisnik thotë:

“Thuaj: O robërit e Mi, të cilët e keni ngarkuar me shumë gabime veten tuaj, mos e humbni shpresën ndaj mëshirës së Allahut, pse vërtet, Allahu i falë të gjitha mëkatet, Ai është që shumë falë dhe është mëshirues!” (Ez-Zumer, 53)

Pyetje:

1. Shpjego për mëshirën dhe Kaderin e Zotit xh.sh.?
2. Thuaje ajetin që thërret për të mos humbur shpresën te Zoti?

DITURIA DHE KADERI I ZOTIT

Dituria e Allahut të Lartmadhëruar kap çdo gjë nga e kaluara, nga e tashmja e nga e dukshmja.

Dituria e Tij është e pakufi. Kjo dituri është në Librin (KITABIN) e Allahut.

Besimtari beson me bindje të plotë se në Librin e Allahut janë të përshkruara, e të gjykuara të gjitha çështjet. Këtë e argumentojmë me fjalën e Allahut xh.sh. në Kur'anin fisnik:

“Çelësat e fshehtësisë janë vetëm te Ai, atë (fshehtësinë) nuk e di kush pos Tij. Ai di çka ka në tokë dhe në det, Ai di për çdo gjeth që bie dhe s’ka kokërr në thellësi të tokës, s’ka të njomë dhe s’ka të thatë që të mos jetë (shënuar) në Librin e qartë (Kitabin mubijnë)”. (El-En’am, 59)

Pyetje:

- 1. Shpjego për diturinë e Allahut xh.sh.?*
- 2. Thuaje ajetin, në të cilin shpjegohet se çelësat e të fshehtave i ka vetëm Zoti i Lartmadhëruar?*

LIBRI DHE KADERI I ZOTIT (KITAB)

LEVHI MAHFUDH quhet libri me të cilin Zoti i Lartmadhëruar ka shkruar të gjitha çështjet, gjithë imtësitë dhe në të cilin çdo gjë e ka përkufizuar me saktësi të plotë.

Zoti i Lartmadhëruar ka ditur, di dhe do të dijë gjithçka. **“Kur Zoti i Lartmadhëruar e ka krijuar lapsin i ka thënë: Shkruaj! Lapsi i ka thënë: Çka të shkruaj o Zoti im? Zoti i ka thënë: Shkruaj për çdo krijesë dhe për çdo ekzistencë dhe është shkruar çdo gjë prej atij momenti e deri në ditën e Kijametit”.**

Këtë e tregon ky ajet kur'anor:
“A nuk e ke ditur se Allahu di çka ekziston në qiell e në tokë, e tërë kjo është e shënuar në libër (LEVHI MAHFUDH). Vërtet ajo për Allahun është shumë e lehtë”. (El-Haxh, 70)

Zoti i Lartmadhëruar na ka urdhëruar që të pajtohemi dhe të qetësohemi me këtë në ajetin fisnik:
“Thuaj: Ne nuk na godet asgjë tjetër, përveç çka na është caktuar nga Allahu; Ai është ndihmëtar yni”. Prandaj, vetëm Allahut le t'i mbështeten besimtarët”. (Et-Tevbe, 51)

Pyetje:

1. *Çka është LEVHI MAHFUDHI?*
2. *Thuaje hadithin, në të cilin shpjegohet se kur e ka krijuar Zoti Lapsin?*

DËSHIRA DHE KADERI I ZOTIT - EL MESHIE

Allahu i Lartmadhëruar njeriun e ka lënë të zgjedhë. Kjo liri e dhuruar prej Allahut është dëshirë e Tij. Allahu i Madhëruar, meqë Vetë ia ka lejuar dëshirën, edhe ia di dëshirën njeriut. Për këtë Allahu i madhëruar në Kur'anin fisnik thotë:

“Po ju nuk doni gjë, pos nëse do Allahu, e Allahu është shumë i dijshtëm, shumë i urtë”. (El-Insan, 30)

Ç’ka do Zoti bëhet e ç’ka nuk do, nuk bëhet. Dëshira e Zotit ka të bëjë me çdo gjë.

Çdo lëvizje në qiej e në tokë dhe çdo heshtje apo moslëvizje në qiej e në tokë ndodhë me dëshirën e Allahut.

Muhamedi a.s. në një hadith ka thënë:

“Secilit prej jush formimi i embrionit në barkun e nënës i bëhet kështu: për dyzet ditë bëhet farë embrioni, pastaj për dyzet ditë bëhet gjak, pastaj për dyzet ditë të tjera bëhet mish, pastaj dërgohet një melaqe për t’i dhënë shpirtin dhe ajo melaqja urdhërohet për katër çështje: për regjistrimin, shënimin e rizkut; për caktimin e exhelit – jetës së tij; për caktimin e veprimtarisë së tij dhe për caktimin nëse ka për të qenë besimtarë (fatlum) apo pabesimtarë (fatkeq) ...”. (Muslimi)

Pyetje:

1. Trego për “Dëshirën e Allahut” dhe dëshirën e krijesave?
2. Trego hadithin që flet për krijimin e njeriut në barkun e nënës?

KRIJIMI DHE KADERI I ZOTIT

Çka ka në qiej e në tokë i ka krijuar Allahu.

Besimtari i vërtetë beson në kaderin e Zotit dhe di se nga kaderi është fakti se Zoti i Madhëruar ka krijuar gjithë krijesat, disa nga të cilat i shohim e disa nuk i shohim, disa i dimë e i numërojmë e disa as i dimë e as mund t'i numërojmë.

Zoti i Lartmadhëruar ka krijuar jetën për ne, por gjithashtu ka krijuar dhe vdekjen.

Zoti i Lartmadhëruar në Kur'an thotë:

“Ai është që krijoi vdekjen dhe jetën, për t’ju provuar se cili prej jush është më vepërmirë”. (El-Mulk, 2)

Në një ajet tjetër Zoti i Lartmadhëruar thotë:

“Ne çdo send kemi krijuar me masë të caktuar”. (El-Kamer, 49)

Ne të gjithë e dimë se Zoti i ka krijuar lumenjtë, kodrat, diellin, hënë, yjet, erërat, njeriun, kafshët dhe se të gjitha gjallesat janë të krijuara ashtu siç ka caktuar Allahu, porse duhet mbajtur parasysh se Allahu në Kur'an thotë se ka krijuar edhe sende e gjallesa të tjera të cilat nuk i dimë.

Pyetje:

1. Shpjego pse Zoti ka krijuar jetën dhe vdekjen?
2. Shpjego për krijesat e Zotit?

KAPITULLI I DYTË

SHEMBUJ SI ËSHTË MANIFESTUAR BESIMI NË KADER

URTËSIA ME TË VEGJËLIT

Enes bin Maliku r.a. ka qenë shërbëtor i Muhamedit a.s. kur ishte i vogël.

Një ditë Muhamedi a.s. e dërgon për ta kryer një punë. Enesi niset për ta kryer punën, dhe udhës takon disa fëmijë duke lozur. Enesi u bashkëngjitet atyre dhe duke lozur harron për të kryer punën për të cilën e kishte urdhëruar i dërguari i Allahut.

Muhamedi a.s. teksa po shkonte në treg e pa Enesin duke lozur me fëmijë dhe e rrok nga pas, i buzëqeshi, dhe mandej i tha: “O Enes shko kryeje punën për të cilën të kam thënë”.

Enesi tha: “Po! o i dërguar i Allahut, po shkoj”.

Enesi r.a. tregon: “I kam shërbyer Muhamedit a.s. nëntë vjet dhe çdoherë kur kam vepruar diçka, nuk mbaj mend të më ketë thënë: Pse e bërë, dhe çdoherë kur nuk e kam kryer një punë, nuk më ka thënë: Pse nuk e ke bërë, gjithmonë thoshte: ***“Çka ka dashur Allahu, është bërë dhe çka nuk ka dashur Allahu, nuk është bërë”***.”

PREJ KADERIT TË ZOTIT NË KADERIN E ZOTIT

Halifja i dytë i muslimanëve – Omeri r.a. - ishte nisur për në Siri. Udhës takohet me komandantët e ushtrisë muslimane. Ata i tregojnë se në Siri ka filluar të përhapet sëmundja ngjitëse e Taunit (kolera). Omeri r.a. pasi u konsultua me shokë vendosi të kthehej, të mos shkonte në Siri që të mos sëmurej nga Tauni.

Ebu Ubejde bin Xherrah r.a. i thotë Omerit r.a.: A po ikën nga kaderi i Zotit xh.sh.? Omeri i përgjigjet: Po, po iki nga kaderi i Zotit që të shkoj në kaderin e Zotit.

Në atë tubim ishte edhe shoku i Muhamedit a.s. Abdurrahman bin Aufi i cili thotë se e kam dëgjuar Muhamedin a.s. të thotë:

“Kur të dëgjoni se në një vend ka sëmundje ngjitëse, mos shkoni atje. Por nëse ka sëmundje ngjitëse aty ku jeni, atëherë mos u largoni nga aty”.

Omeri u gëzua nga ky shpjegim dhe u kthye me ushtrinë e tij.

KADERI DHE DURIMI

Kur të tubohen të gjithë njerëzit për të dhënë llogari para Zotit të Lartmadhëruar, thërret një zë:

“Ku janë durimtarët që të hynë në xhenet para llogarisë”?

Një pjesë e njerëzve ngrihen. Melaqet i pyesin:

- Ku po shkoni o bijtë e Ademit?
- Në xhenet.
- Para llogarisë?
- Po.
- Po kush jeni ju?
- Ne jemi durimtarët.
- Po në se keni duruar?
- Kemi qenë durimtarë dhe i kemi dëgjuar urdhrat e Zotit xh.sh., dhe kemi qenë durimtar, çfarëdo që na ka ndodhur prej Zotit të Madhëruar, jemi pajtuar me **kaderin** e Zotit xh.sh.”.

Zoti i Lartmadhëruar në Kur'an thotë:

“Vërtet durimtarët do të shpërblehen pa llogari”.

KADERI DHE MBËSHTETJA E SINQERTË NË ZOTIN xh. sh.

Rrëfëhet se një ditë e kanë pyetur Ahmed bin Hanbelin për një njeri i cili rrinte vetëm në shtëpi dhe në xhami, dhe që thoshte: Unë nuk punoj asgjë derisa risku (furnizimi i Zotit) të më vijë te këmbët e mia!

Imami Ahmed bin Hanbeli u përgjigj: Ai është njeri i paditur. Pse Muhamedi a.s. ka thënë:

“Nëse ju i mbështeteni Allahut me mbështetje të sinqertë, Ai do të ju japë risk ashtu siç i jep shpendit i cili në mëngjes fluturon prej strofullit të tij i etur e i uritur dhe kthehet i ngopur”. Pra, Muhamedi a.s. ka treguar se shpendi shkon, fluturon dhe kthehet, e ai fluturim është fluturim i kërkimit të riskut.

Muslimani në rend të parë u nënshtrohet shkaqeve, rrjedhave normale që ka caktuar Zoti në këtë botë, pastaj i mbështetet Zotit të Lartmadhëruar, sepse kështu kanë vepruar sehabët e këtë mënyrë veprimi ua ka mësuar Muhamedi a.s.

BESIMI NË KADERIN E ZOTIT E BËN MUSLIMANIN TË FORTË

Besimi në kaderin e Zotit e bën muslimanin më të fortë e më të fuqishëm, sepse i shikon gjërat përpara, zhvillohet dhe forcohet.

Për këtë arsye edhe Muhamedi a.s. në një hadith thotë:

“Besimtari i fortë dhe i fuqishëm është më i dobishëm dhe më i dashur tek Allahu sesa besimtari i dobët e i plogësht. Prej çdo çështje besimtari përfiton. Angazhohu në çështje të dobishme dhe kërko përkujdesje dhe mbrojtje prej Allahut dhe mos u bëj si i paaftë dhe i padobishëm. Nëse të ndodhë diçka mos thuaj: “Sikur të veproja këtë dhe këtë”, por thuaj: “E ka caktuar Zoti (KADERALLAHE), çka ka dëshiruar Allahu, ka ndodhur, sepse fjala “SIKUR”, hapë dyert e vesveseve (pandehnave) të shejtanit”. (Muslimi)

KËSHILLA E MUHAMEDIT A.S. IBN ABASIT

Muhamedi a.s. e ka këshilluar Ibn Abasin në këtë mënyrë:

“O djalosh po t’i mësoj disa çështje:

Ruaji (ligjet) e Allahut, Allahu do të të ruajë ty.

Ruaji ligjet e Allahut, ai do të jetë me ty.

Kur të kërkosh, lutju Allahut.

Për t’i kërkuar mbrojtje, kërko prej Allahut.

Ta dish; nëse i tërë populli tubohet për të bërë dobi, nuk do të munden pos atë dobi që ta ka shkruar Allahu.

Nëse i tërë populli tubohet për të bërë keq, nuk do të munden pos atë që ta ka shkruar Allahu.

Letrat janë mbyllur, e lapsat kanë pushuar së shkruari.

(Tirmidhiu)

PËRFUNDIM

Inxhinieri i cili e shpik një mjet, i di në detaje pjesët e atij mjeti se si do të funksionojnë, e di mënyrën dhe fuqinë e veprimit të atij mjeti, e di edhe afatin e amortizimit dhe të prishjes.

Po ashtu edhe astronomi në bazë të diturisë së tij e di drejtimin, shpejtësinë dhe vendin nëpër të cilin lëvizë apo qarkullon në gjithësi. Derisa njeriu me dituri të kufizuar i di këto çështje, atëherë si është e mundur që zbuluesi dhe Krijuesi i gjithësisë të mos i parasheh dhe të mos i dijë të gjitha çështjet në mënyrë të detajuar me diturinë e Tij të pakufizuar.

Dituria e Allahut përfshinë të kaluarën, të tashmen, dhe të ardhmen. Pra, dituria e Allahut përfshinë; çka ka qenë, çka është dhe çka do të jetë. Dituria e Allahut është e përpiktë dhe precize.

Behet pyetja: Pse të besojmë në Kaderin e Zotit?

Besimi në Kaderin e Zotit na mbron nga dobësimi dhe pikëllimi, nga hidhërimi dhe dëshpërimi, sepse durojmë vetëm për atë se ashtu e ka caktua Zoti e jo për diçka tjetër.

Besimi në kaderin e Zotit na forcon zemrën dhe na pasuron shpirtin, sepse besimtari i cili beson në kaderin e Zotit bëhet i vendosur, stabil dhe trim, sepse ai e di se nuk mund t'i ndodhë asgjë atij përpos çka ka qenë e caktuar në diturinë e Allahut. Ai e di se edhe dëmi edhe dobia janë në dorë të Allahut.

Besimi në kaderin e Zotit na ruan nga urrejtja dhe zilia, sepse ai i cili bën zili në tjetrin ai nuk është pajtuar me kaderin e Zotit.

Besimi në kaderin e Zotit na obligon me u angazhua në punë, në vepra të mira dhe na obligon me i përdor të gjitha mjetet dhe mundësitë të cilat na i ka dhënë Allahu për gjëra të mira, të vlefshme dhe të dobishme.

Besimi në kaderin e Zotit është begati prej Zotit dhe preventivë për t'u mbrojtur nga të këqijat.

Përmbajtja

Hyrje.....	6
KAPITULLI I PARË	7
PËRKUFIZIMI I KADASË DHE KADERIT.....	8
LLOJET E KRIJESAVE	9
NJËSIMI I ZOTIT DHE KADERI.....	10
DREJTËSIA DHE KADERI I ZOTIT	11
MËSHIRA DHE KADERI I ZOTIT	12
DITURIA DHE KADERI I ZOTIT.....	13
LIBRI DHE KADERI I ZOTIT (KITAB).....	14
DËSHIRA DHE KADERI I ZOTIT - EL MESHIE.....	15
KRIJIMI DHE KADERI I ZOTIT	16
KAPITULLI I DYTË	17
SHEMBUJ SI ËSHTË MANIFESTUAR BESIMI NË KADER.....	17
URTËSIA ME TË VEGJËLIT	18
PREJ KADERIT TË ZOTIT NË KADERIN E ZOTIT	19
KADERI DHE DURIMI	20
KADERI DHE MBËSHTETJA E SINQERTË NË ZOTIN xh. sh.....	21
BESIMI NË KADERIN E ZOTIT E BËN MUSLIMANIN TË FORTË.....	22
KËSHILLA E MUHAMEDIT A.S. IBN ABASIT	23
PËRFUNDIM.....	24